



PENGLIBATAN ahli akademik dari Universiti Putra Malaysia dalam Program Pemindahan Ilmu memberi manfaat besar kepada para penternak kambing di Mukim Batu Talam, Raub sejak empat tahun lalu.

UPM tingkat ekonomi penternak kambing di Raub

KUALA LUMPUR 6 Dis. - Program Pemindahan Ilmu yang diimplementasikan selama dua tahun mulai 2011 di Mukim Batu Talam, Raub, Pahang dan melibatkan pengusaha kambing di lima buah kampung telah memberi manfaat besar kepada kumpulan tersebut.

Hasilnya, senario telah berubah daripada penternak yang berhadapan dengan 1001 masalah dalam penjagaan kambing kepada penternak yang lebih berdikari serta berdaya maju.

Punca masalah yang dikenal pasti adalah kekurangan ilmu dalam penternakan kambing dan kurang kesedaran kepada peluang ekonomi yang ada di kampung untuk pengusaha dan keluarga.

Penglibatan ahli akademik Universiti Putra Malaysia (UPM) serta siswazah pelatih yang diketuai oleh Pakar Pemakanan dan Analisis Sistem Haiwan, Prof. Madya Dr. Azhar Kasim berjaya mengenal pasti masalah serta peluang yang ada.

Ilmu tersebut dimanfaatkan melalui lawatan berkala bagi memberi tunjuk ajar bersemuka serta beberapa kursus dan lawatan sehingga penternak telah capai ke ta-

hap boleh berdikari dan membuat keputusan.

Azhar berkata, secara fizikal, perubahan pendapatan dan taraf hidup penternak kambing dan keluarga telah dapat ditingkatkan melalui program kajian keilmuan ini.

"Contohnya salah seorang penternak Najid Husin dapat meningkatkan bilangan ternakan kambing selain kandang kambingnya telah diperbesar. Dia menerapkan kaedah menggunakan dedaun daripada tumbuhan belukar dan tepi jalan sekiranya rumput tidak mencukupi.

"Dengan bahan hijau yang cukup serta aplikasi dedak sebagai makanan tambahan, kambing kacukan Katjang yang diternak kerap menghasilkan anak kembar dua dan tiga. Malahan ada juga kambing yang beranak kembar empat," katanya.

Sementara itu, Albadrulsam Awang berkata, menerusi program tersebut bilangan anak kambingnya bertambah dan memberi inspirasi kepada dia untuk bergiat sebagai pengedar kambing selain membantu peserta program menyelesaikan masalah pemasaran.

"Modal perniagaan menjual kambing itu, saya gunakan untuk bergiat aktif dalam penternakan lembu pula. Selain menambahkan ilmu menternak kambing, program ini juga memberi ruang kepada ahli keluarga untuk menerima latihan dalam bidang punca ekonomi tambahan seperti menjahit tudung dan pembuatan kuih dan biskut. Impaknya ialah hasil jualan dari punca tambahan ini berjaya meningkatkan pendapat seisi keluarga penternak kambing," katanya.

Sementara itu, Azhar berkata. kejayaan program ini dapat dilihat dari beberapa sudut sehingga boleh dilaksanakan di seluruh negara.

"Antaranya, penternak bertambah bijak mengawal selia ternakan dengan kesihatan kambing dan kadar beranak bertambah selain mendorong penduduk lain di mukim yang sama memilih penternakan kambing sebagai satu sumber pendapatan yang berdaya maju.

Penternak yang berjaya dan mampu berdikari berkebolehan memberi tunjuk ajar kepada pendatang baru dalam penternak kambing serta dapat menjamin pasaran bagi kambing," katanya.